

## ESMERALDA TABAKOVIĆ

Technical Team Lead at Mistral

**UPORNOST, ZNATIŽELJA  
I DOBAR TIM SU RECEPT  
ZA USPJEŠNU KARIJERU  
U IT INDUSTRIJI**



**NAŠE WEPs PUTOVANJE  
PRINCIP 4:  
OBRAZOVANJE  
I OBUKA ZA  
NAPREDOVANJE  
U KARIJERI**

Esmeralda Tabaković već četiri godine radi u kompaniji Mistral u Sarajevu. Iako prvobitno studentica smjera za telekomunikacije na Elektrotehničkom fakultetu, Esmeralda se još u srednjoj školi zaljubila u programiranje. Prateći prilike koje su se nudile u njenom okruženju, pridružila se "Gigi School of Coding" - prestižnoj četveromjesečnoj praksi pri kompaniji Mistral. Danas vodi jedan od najvećih timova u Mistralu u ulozi Technical Lead-a.

„Nakon završene obuke dobila sam posao na poziciji junior programerke. Iako sam primarno željela da se bavim backend tehnologijama, dodijeljena sam na projekt koji je bio fokusiran na frontend. Danas kada me pitaju sa kojim tehnologijama najviše volim raditi, ističem Angular. Volim strukturu i školski definisan rad, pa najviše volim raditi sa JavaScript baziranim tehnologijama, kao i sa .NET i .NET Core tehnologijama,“ kaže Esmeralda.

Put od junior programerke do Tech Lead-a na jednom od velikih projekata za nju je bio pun učenja i istraživanja.

„Ne može se sve svesti na jedan projekat. Važno je stalno biti u toku sa tehnologijama jer se one svakodnevno mijenjaju i usavršavaju. Biti dobar u ovom poslu znači mnogo istraživanja, testiranja i praćenja novih trendova,“ kaže ona. Uloga koju trenutno obnaša u Mistralu jedna je od senior pozicija i podrazumijeva poznavanje konteksta cijelog projekta: „U stalnoj sam komunikaciji sa klijentom, pravim plan i raspored rada u timu i istovremeno programiram, te na kraju pregledam kod ostalih članica i članova tima. Moj zadatak je i da pratim razvoj projekta i zajedno sa ostatkom tima klijentu predložim potencijalna unaprjeđenja na projektu, tako da je i tu jako bitno da sam u toku sa razvojem tehnologije,“ dodaje Esmeralda.



*Ne može se sve svesti na jedan projekat. Važno je stalno biti u toku sa tehnologijama jer se one svakodnevno mijenjaju i usavršavaju.*



Ponukana stalnim učenjem, trenutno istražuje oblast umjetne inteligencije (AI) i završava certificirani program iz ovog područja. Kada je u pitanju inspiracija, Esmeralda ističe da je najviše motivišu ljudi kojima je okružena.

„Pored stalnog učenja, napredovala sam i zbog ljudi sa kojima radim jer su me motivisali da uvijek gledam širu sliku zašto nešto radi i kako se može bolje napraviti. Ipak, moja najveća inspiracija i uzor je uvijek bila moja mama, od nje stalno učim kako biti uspješna u onome što radim. Iako ona nije programerka, pokazala mi je kako se ruše barijere u poslovnom svijetu i na tom sam joj neizmjereno zahvalna.“

Na kraju, kao poruku djevojčicama i djevojkama kada je riječ o bavljenju programiranjem, ističe da ne treba dozvoliti okolini da odlučuje šta možemo ili ne možemo raditi.

„Ako vam se nešto sviđa, ako nešto stvarno želite, učinite sve da to i ostvarite. Nemojte dozvoliti da vas nešto opstruira i sputava vam snove“, zaključuje Esmeralda.